



# PATNUBAY SA MISA

17 Hunyo 2018

Ika-11 Linggo sa Karaniwang Panahon

Taon B

## MGA SAKSI AT KATUWANG SA MGA KAHANGA-HANGANG GAWA NG PANGINOON

**N**gayong Linggo, inaanyayahan tayong pagnilayan ang kagandahan ng Kaharian ng Diyos. Ang kamangha-manghang handog na ito ay nakaugat sa pag-ibig ng Panginoon sa sangkatauhan. Ito ang GAWAIN ng Diyos at tinitiyak nito ang tagumpay ng mga gawaing ito na kung saan hinihikayat ang sangkatauhan na makibahagi bilang mga katuwang.

Ang proyektong ito ng Kaharian ay inilunsad ng Nagkatawang-taong Anak ng Diyos, si Hesukristo. Hindi lamang siya ang pinakamabunying tagapagpahayag, kundi siya rin ang pinakaperpektong pagpapatotoo nito, at samakatuwid, ang ating pinakamataas na modelo na dapat gayahin.

Sa Eukaristiya pupurihin natin ang Panginoon sa kahanga-hangang paglago ng Kaharian sa ating sarili at kapaligiran. Pasasalamatan din natin Siya sa kanyang paglikha sa atin di lamang bilang mga saksi sa mga kagandahang ito, kundi bilang Kanyang mga mapagkumbabang katuwang sa paglago ng Kaharian.



### PASIMULA



#### Pambungad

(Ipahayag lamang kung walang awiting nakahanda.)

**Dinggin mo ang aking tawag, Poon, ikaw ay mahabag, ako'y tulongan mo agad. Akin kitang hinahanap, huwag biguin aking sikap.**

#### Pagbati

**P**–Purihin ang Panginoong ating Diyos, na siyang simula at katuparan ng “Kaharian ng Diyos.” Ang pagpapala Niya at kapayapaan ay sumainyong lahat!  
**B**–At sumaiyo rin!

#### Pagsisisi

**P**–Sa paghahanda natin para sa pagdiriwang ng Eukaristiyang ito, alalahanin natin ang mga pagkakataong di sumasalamang at ating mga gawa sa mga pagpapahalaga ng Kaharian. (Tumigil saglit.)

**P**–Panginoong Hesus, sinugo ka ng Ama upang ipahayag at itatag ang Kaharian ng Diyos dito sa lupa. Panginoon, kaawaan mo kami!

**B**–Panginoon, kaawaan mo kami!

**P**–Panginoong Hesus, ikaw ang walang kapintasang kaganapan at modelo ng Kaharian. Kristo, kaawaan mo kami!

**B**–Kristo, kaawaan mo kami!

**P**–Panginoong Hesus, tinawag mo kaming makibahagi sa pagpapalaganap at pagtatatag ng Kaharian ng Diyos. Panginoon, kaawaan mo kami!

**B**–Panginoon, kaawaan mo kami!

**P**–Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

**B**–Amen!

#### Papuri

**B**–Papuri sa Diyos sa kaitaasan at sa lupa’y kapayapaan sa mga

taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

#### Panalangin Pambungad

**P**–Ama naming makapang-

yarihan, lakas ka ng mga walang inaasahan kundi ikaw. Ang pagluhog namin ay iyong pagbigyan sapagkat kami'y mga tao lamang na pawang mahihina kapag iyong iniwanan; kaya naman kami'y lagi mong tulongan upang sa pagtupad ng iyong mga kautusan ikaw ay aming mabigyang kasiyahan sa aming iniisip at ginagawa araw-araw sa pamamagitan ni Hesukristo kasama ng Espiritu Santo magpasawalang hanggan.

**B – Amen!**

**PAGPAPAHAYAG NG SALITA NG DIYOS**



**Unang Pagbasa Ez 17:22-24**

*Pakiramdam ng mga Isra-  
raelita na sila ay pinabayaan  
na ng Panginoon habang sila  
ay nabubulok sa kanilang  
pagkakatapon sa Babiloniya,  
malayo sa kanilang lupang  
sinilangan at api-apihan ng  
kanilang mga panginoon. Sa  
pamamagitan ng propetang  
si Ezekiel, binigyan sila ng  
Panginoon ng pag-asa habang  
isiniwalat niya sa kanila ang  
magandang kinabukasang  
naghihintay para sa kanila.*

**L –** Pagpapahayag mula sa Aklat ni Propeta Ezekiel

Ito nga ang ipinasasabi ng Panginoon, “Kukuha ako ng isang usbong ng sedro at aking iaayos. Ang kukunin ko'y yaong pinakamura ng pinakamataas na sanga. Itatanim ko ito sa isang mataas na bundok, sa pinakamataas na bundok ng Israel upang lumago at mamungang mabuti at maging isang kahanga-hangang sedro. Sa gayon, lahat ng uri ng hayop ay makapaninirahan sa ilalim nito. Ang mga ibon nama'y makapamumugad sa mga sanga nito. Kung magkagayon, malalaman ng lahat ng punongkahoy na mapabababa ko ang mataas na kahoy at maitataas ko yaong mababa; na matutuyo ko ang sariwang kahoy at mapananariwa ko yaong tuyong punongkahoy. Akong Panginoon ang nagsasabi nito at ito'y gagawin ko.”

Ang Salita ng Diyos!  
**B –** Salamat sa Diyos!

**Salmong Tugunan Awit 91**

**B –** Totoong kalugud-lugod ang magpasalamat sa D'yos!

R. M. Velez



To-to-ong ka-lugud lu-god ang mag-



pasa - la - mat sa D'yos!

\* Ang magpasalamat sa Panginoong Diyos ay mabuting bagay, umawit na lagi, purihin ang ngalang Kataas-taasan. Pag-ibig n'yang wagas ay dapat ihayag, kung bukung-liwayway; pagsapit ng gabi ang katapatan n'ya'y ihayag din naman. **B.**

\* Katulad ng palma, ang taong matuwid tatatag ang buhay, parang mga sedro, kahoy sa Libano, lalagong mainam. Parang punongkahoy na doon natanim sa tahanan ng Diyos, sa banal na templo ito ay lalago na nakalulugod. **B.**

\* Tuloy ang pagbunga kahit na ang punong ito ay tumanda, luntia't matatag, at ang dahon nito ay laging sariwa. Ito'y patotoo na ang Panginoon'y tunay na matuwid, siya kong sanggalang, matatag na batong walang bahid dungis. **B.**

**Ikalawang Pagbasa 2 Cor 5: 6-10**

*Sa kanyang liham sa mga taga-Corinto, binigyang-diin ni Pablo na, bagamat nais nilang makapiling kaagad ang Panginoon, ang higit na mahalaga ay ang mamuhay nang kaaya-aya sa paningin ng Panginoon, bilang paghahanda sa araw ng paghuhukom.*

**L –** Pagpapahayag mula sa Ikalawang Sulat ni Apostol San Pablo sa mga taga-Corinto

Mga kapatid, laging malakas ang aking loob. Alam ko na habang tayo'y nasa tahananang ito, ang ating katawan, hindi mapapasaatin ang tahananang galing sa Panginoon. Namumuhay ako ayon sa pananalig sa Diyos, hindi sa mga bagay na nakikita. Malakas nga ang loob kong iwan ang katawang ito na aking tinatahanan upang manirahan sa piling ng Panginoon. Kaya naman, ang pinakananais ko ay maging kalugud-lugod sa kanya, sa tahananang ito o doon man sa langit. Sapagkat bawat isa ay haharap sa hukuman ni Kristo upang tumang-

gap ng kaukulang ganti sa kanyang ginawa, mabuti man o masama, nang siya'y nabubuhay pa sa daigdig na ito.

Ang Salita ng Diyos!  
**B –** Salamat sa Diyos!

**Aleluya**

**B –** Aleluya! Aleluya!  
Salita ng D'yos ang buto na tanim ni Hesukristo upang tumubo sa tao. Aleluya! Aleluya!

**Mabuting Balita Mc 4:26-34**

*Inihalintulad ni Hesus ang Kaharian sa isang buto. Sa unang parabola, binigyang-diin niya na ang kakayahan ng Kaharian upang lumago ay di mula sa tao kundi sa Diyos. Sa ikalawang parabola, ipinakita niya na ang isang maliit na buto ng Kaharian ay may kakayahang lumago sa paraang kamanghamanga.*

**P –** Ang Mabuting Balita ng Panginoon ayon kay San Marcos  
**B –** Papuri sa iyo, Panginoon!

Noong panahong iyon, sinabi ni Hesus sa mga tao, “Ang paghahari ng Diyos ay maitutulad sa isang naghasik ng binhi sa kanyang bukid. Pagkatapos niyon, magpapatuloy siya sa kanyang pang-araw-araw na gawain; tutubo at lalago ang binhi nang hindi niya nalalaman kung paano. Ang lupa'y siyang nagpapasibol at nagpapabunga sa mga pananim: usbong muna, saka uhay na pagkatapos ay mahihitik sa mga butil. Pagkahinog ng mga butil, agad itong ipagagapas sapagkat dapat nang anihin.

Sa ano natin ihahambing ang paghahari ng Diyos?” sabi pa ni Hesus. “Anong talinghaga ang gagamitin natin upang ilarawan ito? Tulad ito ng butil ng mustasa na siyang pinakamaliit sa lahat ng binhi. Kapag natanim na at lumago, ito'y nagiging pinakamalaki sa lahat ng puno ng gulay; nagkakasanga ito nang malalabay, anupat ang mga ibon ay nakapamumugad sa mga sanga nito.”

Ang Salita'y ipinangaral ni Hesus sa kanila sa pamamagitan ng maraming talinghagang tulad nito, ayon sa makakaya ng kanilang pang-unawa. Hindi siya nangaral sa kanila nang hindi gumagamit ng talinghaga; ngunit ipinaliwanag niya nang sarilinan sa kanyang mga alagad ang lahat ng bagay.

Ang Mabuting Balita ng Panginoon!  
**B – Pinupuri ka namin, Panginoon ng Hesukristo!**

### Homiliya

#### Sumasampalataya

**B** – Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tawang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

#### Panalangin ng Bayan

**P** – Ipinaaalaala ng ating Ebanghelyo ngayon na sa pagsasakaturparan ng plano ng Diyos, hindi tayo dapat maging mga manonood bagkus dapat tayong maging mapagbigay na mga katuwang na nakikibahagi sa pagpapakalat ng buto ng Kaharian at tupdin ang mga kahingian nito sa ating pang-araw-araw na pamumuhay. At sa ating paghingi ng grasya para sa katuparan nito, ating sabihin:

**B – Panginoon, mapasaamin nawa ang Kaharian Mo!**

\* Para sa Simbahan, na inatasan ni Kristong ipagpatuloy ang kanyang misyong maghasik ng buto ng Kaharian sa buong mundo: Nawa’y gawin niya ito nang may buong katapatan at puspos ng pag-asa ang puso. Manalangin tayo!  
**B.**

\* Para sa Santo Papa at lahat ng pinuno ng mga lokal na sambayananang Kristiyano: Nawa higit pa

nilang gabayan ang mga mananampalataya sa pamamagitan ng kanilang masiglang pagpapahayag ng Kaharian at pagsasabuhay nito. Manalangin tayo!  
**B.**

\* Para sa mga pinunong sibil, ng pulitika at kultura: Nawa ang kanilang mga balakin at paggawa ay higit na magpaunlad at magpatibay sa mga pinahahalagahan ng Kaharian ng Diyos, tulad ng katarungan, kalayaan, at kapayapaan. Manalangin tayo!  
**B.**

\* Para sa mga magulang, guro, katekista, at para sa lahat ng may tungkuling humubog ng bagong henerasyon: Nawa’y maging mahalaga silang katuwang sa paghahasik ng buto ng Kaharian at sa pagpapalaganap nito sa puso at kaisipan ng bawat kabataan na ipinagkatiwala sa kanilang pangangalaga. Manalangin tayo!  
**B.**

\* Para sa ating parokya, mga BEC, at mga komunidad na karismatiko: Nawa sila’y maging tanda at tagapagdala ng kapangyarihan at kabanalan ng Kaharian ng Diyos sa lahat ng mga kasapi ng ating lipunan. Manalangin tayo!  
**B.**

\* Ipanalangin natin nang tahimik ang ating mga pansariling kahilingan at pangangailangan. (*Sandaling manahimik.*)  
**B.**

Manalangin tayo!

**P** – Panginoong Diyos, Ikaw ang pasimula, ang tagapagtugyod, ang lubos na katuparan ng kagandahan ng iyong Kaharian. Kami’y nagpapasalamat na kami’y Iyong tinawag upang maging katuwang sa pagpapalaganap ng Iyong mapagligtas na panukala. Pagkalooban mo kami ng pananampalataya, kababaang-loob, at tiyagang kinakailangan namin upang aming matupad ang dakilang misyong ito. Sa pamamagitan ni Kristong aming Panginoon.  
**B – Amen!**

**B – Amen!**



**P** – Manalangin kayo . . .

**B** – Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

#### Panalangin ukol sa mga Alay

**P** – Ama naming Lumikha, kami’y ginawa mong may angking katauhan na dapat pakanin at pangalagaan at iyong dinudulutan ng banal na pakikinabang. Ipagkaloob mong kami’y huwag magkulang sa mga iniuukol mo sa aming kapakanan sa pamamagitan ni Hesukristo kasama ng Espiritu Santo magpasawalang hanggan.  
**B – Amen!**

#### Prepasyo VII

**P** – Ama naming makapangyarihan, tunay ngang marapat na ikaw ay aming pasalamatan.

Kahit na ikaw ay pinagtaksilan ng sangkatauhan, ikaw ay patuloy pa rin sa iyong pagmamahal. Ikaw na ang nagpuno sa aming pagkukulang; ikaw pa rin ang nagsugo ng tutubos sa tanan. Ang sugo mong Anak ay naging di na iba sa amin bagama’t di niya tinularan ang aming pagkamasuwayin. Nilooob mo ito upang iyong mamalas sa aming pagkatao ang giliw mong Anak at kami’y tunghayan mong may pag-ibig na tulad ng pagtatangi mo sa kanya nang higit sa lahat. Ang katapatan niya sa iyong walang maliw ay nagpanumbalik na muli sa amin ng iyong kasiyaha’t ng iyong pagtingin na aming iwinaksi noong ikaw ay aming suwayin.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami’y nagbubunyi sa iyong kadakilaan:

**B – Santo, santo, santo . . .**

#### Pagbubunyi

**B** – Sa krus mo at pagkabuhay kami’y natubos mong tunay, Poong Hesus naming mahal, ilitas mo kaming tanan ngayon at magpakailanman.



**B** – Ama namin . . .

**P** – Hinihiling namin . . .

**B** – Sapagkat iyo ang kaharian at ang kapangyarihan at ang kapurihan magpakailanman! Amen!

#### Paanyaya sa Kapayapaan

#### Paghahati-hati sa Tinapay

**B** – Kordero ng Diyos na nag-aalis

ng mga kasalanan ng sanlibutan, maawa ka sa amin. (2x)  
**Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.**

**Paanyaya sa Pakikinabang**

**P**– Ito ang Panginoong Hesus, ang banal na tagapaghasik ng buto ng Kaharian at ang lubos na katuparan ng kanyang mga kakayahan. Siya ang Kordero ng Diyos na nag-aalis ng mga kasalanan ng mundo. Mapalad ang tinawag sa Piging ng Kaharian!

**B**– Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

**Antipona ng Pakikinabang**

(Ipahayag lamang kung walang awiting nakahanda.)

Ang aking tanging mithiing sa Diyos ay hinihiling na siya ay makapiling sa tahanan n'yang maningning ay akin ngayong hangarin.

**Panalangin Pagkapakinabang**

**P**– Ama naming mapagmahal, ang pinagsaluhan naming banal na pakikinabang na nagpapahiwatig ng iyong pakikiisa sa tanang naritong nakikipagdiwang ay magdulot nawa ng pagkakaisa sa iyong Sambayanan sa pamamagitan ni Hesukristo kasama ng Espiritu Santo magpasawalang hanggan.

**B**– Amen!



**P**– Sumainyo ang Panginoon.

**B**– At sumaiyo rin!

**P**– Yumuko at hilingin ang pagpapala ng Panginoon.

(Manahimik sandali.)

Malugod na pinili ng Ama na ipagkatiwala ang kayamanan ng Kaharian sa inyo. Pahala-

gahan nawa ninyo ito at ibahagi ang Kanyang pagpapala sa mga nasa paligid ninyo.

**B**– Amen!

**P**– Pagyamanin nawa ninyo ang mga pagpapahalaga ng Kaharian, itaguyod ang mga ito, at isabuhay sa araw-araw na pamumuhay.

**B**– Amen!

**P**– Pagkalooban nawa kayo ng Panginoon ng malinaw na kaisipan, dalisay na puso, at matibay na kalooban upang

maging tagapagpahayag at manggagawa ng Kaharian dito sa lupa, at maging tagapagmana ng mga pagpapala sa kabilang buhay.

**B**– Amen!


**P**– Pagpalain nawa kayo ng makapangyarihang Diyos: Ama, Anak, at Espiritu Santo.

**B**– Amen!

**P**– Humayo kayo sa kapayapaan ni Kristo at maging mga saksi ng Kaharian saanman kayo naroroon.

**B**– Salamat sa Diyos!

**Enjoy Pope Francis' heart-warming latest Apostolic Exhortation:**



in its **STUDY EDITION**

In addition to the Holy Father's Exhortation, this mini encyclopedia on "MIDDLE-CLASS HOLINESS" includes:

- \* An extensive Subject Index
- \* Quotable Quotes from G.E.
- \* Methodological Suggestions
- \* A collection of Biblical passages on holiness
- \* Filipino Way to Holiness . . . and much more!

**Order now from Word & Life Publications!**



**In this month of June, don't forget to get your copy of:**  
**HEARTS ABLAZE WITH LOVE**  
 and  
**THE LITANY OF THE SACRED HEART**



**WORD & LIFE PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org; wordandlifepublications@gmail.com • FB: Word & Life Publications

• Editorial Team: Fr. S. Putzu, C. Valmonte, G. Ramos, V. David, J. Domingo, A. Adsuara, D. Daguió

• Illustrations: A. Sarmiento, B. Cleofe • Marketing: Fr. B. Nolasco and T. Mojica • Circulation: R. Saldúa